



Tuts per in - in per tuts

Mintga singul ha flaivezzas, ma era fermezzas particularas. I na dependa ni da la colur ni da la razza umana. Cuminavlamain essan nus fermes. Tuts per in ed in per tuts. Qua tras pudain nus realisar blers siemis.

Cuminavlamain essan nus fermes! A questa conclusiun vegnan insaquants animals d'ina fabla che van davent da chasa per scuvrir il mund. Las flaivezzas dals singuls vegnan cumpensadas da las fermezzas dals auters. Ina mieur ch'è ina pensadra raffinada, ina talpa che savura bain, ina rauna sportiva che po far miraclas, in erizun che daventa in bun pertgirader ed ina merlotscha che discorra per tuts, sa mettan sin via. Mintgin accepta ils auters sco quai ch'els èn. Acceptanza e toleranza èn il fundament da lur amicizia. Il cumenzament da questa fabla pon ins era transferir sin l'uman. Empè d'animals pon ins era prender Tircs, Serbs, Talians, Americans e Svizzers. Atgnamain essan nus tuts umans e tuttina manca la toleranza ed acceptanza vicendaivla. Tgi che manchenta d'emprender en giuvens onns il cumportament social, pia da tractar tuts a moda eguala, vegn semper ad avoir pregiudizis envers esters. Els vesan forsà ora auter e lur mentalità è differenta da la nossa. Na fissi però betg interessant da chapir lur vista e lur tradiziuns? I dependa da mintga singul, co ch'el vul vesair ses concarstgauns. Avant che jau giuditgesch e sentenziesch mes conuman pens jau pli gugent: «Pasch saja cun tai!» Grazia a questa tenuta construesch jau adina puspè punts cun umans d'autras culturas. Pir quai fa interessanta la vita. Plain tensiun spetg jau sin la proxima scuntrada ed in da mes siemis sa realisescha ina giada dapli. Quant bel...

Sibylle Pfiffner